

試律集

感事二首

難託幽懷寄鶴外，曾緣望眼指雲間。埃塵長路幾回首，蹭蹬一身唯汗顏。自負詩心深感慨，多驚世味飽辛艱。年來年去太容易，花謝花開元等閒。

其二

玉種藍田情未遠，珠遺滄海夢難圓。才堪忤俗渾無用，生不逢時亦可憐。蝸角功名屬誰物，羊腸世路乃窮年。且還詩圃多耘耨，莫向龍門費討研。

惜春

斷紅難借東風去，積綠悄隨華髮生。無限風光空雨跡，幾多懷抱付溪聲。亭臺永日翻幽澹，蜂蝶黃昏亦冷清。正自晚花都不語，數他春燕最多情。

道中見雨燕飛迴賦

晚春天氣聽初雷。即此銀絲洗積埃。如畫濃雲山暗淡，穿梭細雨燕低迴。週旋顧影無何有，斜翦受風歸去來。王謝堂簾又歲隔，烏衣巷陌待君陪。

春雨

歸去春聲聽點滴，忽來銀箭看縱橫。斜穿花徑夢已遠，直下雲天愁乃生。雷雨島南晚更急，風濤溪曲岸初平。從教春老一朝暮，付與梅黃時晦明。時南臺暴雨。春字重出不避。

喜晴

綠潤紅稀經雨後，天潮地濕入梅時。初開雲隙射光箭，好向庭隅收錦帷。朗照君原當所遇，幽棲我故舊相知。樓中疏影憑誰識，簾外清光一任之。

苦雨

似春不去暖還寒。行雨應多悲與歡。樓閣高難避潮氣，煙雲低漸漫花欄。合圍萬里逃無地，一瀉重簷下九湍。積潤衣鞋常半濕，新痕書紙再三看。

觀網有卜居之嘆簡內人

十年落拓意多違。一夢繁華事漸稀。卜築無憑難出手，經營何益不投機。文章俯仰我深愧，親友往來卿可依。彈指悠悠渾漫覺，回眸事事竟全非。

自題

四十四年如電抹，花非花矣更誰堪。深知此際堪深味，自負多時漸自慚。素有愁痕難淡薄，無多心事亦沉耽。襟懷寂寞憑燈火，詩句平生付笑談。

送春

虛檐聽雨春歸去，深巷落花誰款留。點綴生涯還顧影，凋零意緒卻疑秋。兩三蝶羽來遺萼，無限冰心與碧流。對此淒清太惆悵，偏勞念想託鳬鷗。

淡水感舊

山風海雨舊相知。秋月春花故所思。夢繫長河無盡處，魂銷落日有窮時。閒階隔岸潮常泛，小巷經年燕到遲。最羨橫波雙白鷺，相隨倒影共清漪。

挽春吟

夕陽山外春如在，人境花餘夢已遲。又送東風從此去，偏傷香靄不堪題。無多蜂蝶頻來別，何處園廬尚可期。我更依依誰得似，萼殘往往最相知。

傷足自戲

一任形神半衰病，偏能坐臥太蕭閒。欄干側近還相倚，樓閣憑高那可攀。跚蹀何須嗟獨足，飛騰不免有重關。從來顛躓生涯裡，未必艱難懷抱間。

偶感

小山眉已驚霜白，秋水瞳曾帶露清。廿載堂堂從此別，中宵了了為誰明。春風秋雨時仍往，晚日淡煙痕更生。歲月如歌原是夢，滄桑依舊不留情。

夜中聽歌感舊

鬢痕燈影誰家鏡，舊跡前盟一寸心。數曲青春歌緩緩，廿年落照夢深深。元非浮世事如昨，總是孤懷月在襟。試茗無端春枕斷，看他幾許曉星沉。

廿年二首寄內

廿年荏苒豈蹉跎。到底歡悲費琢磨。休說浮生只如此，元知多事本無何。寄身於世歲還月，攜手歷他風與波。一綵青絲換紅豆，幾多太息任長歌。

其二

換去堂堂已廿年。擬將種種認前緣。我今憶舊痕何得，誰與重來事枉然。多忤平生多愛悔，每思他日每憂憐。關情漸許看初霽，過眼何妨向晚煙。

國會近事感賦

百年不過槐安夢，萬事也如華表雲。可笑蝸爭隨變滅，無端鴉噪各紛紜。春風得意誰長久，心眼憂時多垢氛。弦箭須臾真一放，海舟搖蕩近同焚。

聞共機擾臺有作

聲從西北來秦鼓，誰與東南著祖鞭。才報兵塵傳羽檄，遙看鯨海起狼煙。和平二字真如夢，生聚十年非浪傳。更有軍機繞雲嶠，得無廟算護野田。

第十四屆蔣國樑古典詩創作大賽暨立夏詩會後感賦三首

詩涵海氣兼山色，聲遏江潮到夕曛。十四年間風雅會，八千里外卷舒雲。緣生盛德循遺志，事散繁華憶舊文。零雨淒淒情未了，前塵歷歷夢無垠。

其二

高情逸響應猶在，大雅元音信未曛。淡水潮回偏北渚，雄州日照向南雲。交修冰玉題襟客，賡詠靈心織錦文。棣萼幾人分海內，蓼莪一曲憶天垠。

其三

傾心標格十四載，引領丰神曾幾曛。騷脈南傳生遠火，詩聲不信與歸雲。登台最是驚唱作，擊鉢從來衡韻文。此地長歌揮玉袂，何年諸社會江垠。

即事

東南橫渡二百里，舟艇長驅唯一人。指點乾坤入望眼，蒼茫江海似潛身。關防可奈成虛設，兵將直疑每浪巡。莫待河山終寂寞，空餘涕淚想沉淪。聞陸退役艦長阮某駕鴻津號快艇橫海百八十里直入淡水河口。

望海

蟠胸區宇每多嘆，展眼長堤聊一吟。落照初生有冰魄，層濤不盡在風襟。浮雲西北神州夢，碧血東南海嶠心。偏看波瀾落復起，枉教歲月古為今。

臺灣

萬古蓬萊憑一浹，九州瀛海隔孤隅。殊方正朔荷兼日，異代衣冠爾與吾。閒草從來幾興替，歸雲何處問津途。暫依護國金晶玉，難傍籌謀碧眼胡。

泛鷗

晶圓舉國成趨鶩，文脈微流數泛鷗。點水飄搖向風雨，遠人零落幾春秋。汀洲飲啄每多難，江海沉浮懷百憂。何用傷心說偃蹇，也知照影為遲留。AI 當道，晶圓產業如滄海橫流，人文幾似敝屣。

讀元遺山詩

五言高古七言悲。一代文宗百代師。海裔襟懷豫州史，金源風骨老元詩。關河殘破感劫後，鼓角死生傷戰時。沉鬱深迫杜陵客，孤清獨對梁苑墀。

雨後車過羅斯福路聞蟬

小巷南薰涼已透，京華西照影微紅。萬燈初月仍疏雨，一樹高蟬噪晚風。閒夏能銷如世外，市囂誰與逐城中。如何碎語知了客，正對吟懷衰矣翁。

再讀元遺山詩

客樽詩筆遺民夢，老去憂來野史亭。一代儒冠苦蕭索，百年國事付零星。繫舟山下雲迢遞，瘞雁丘前路杳冥。回首蒼茫將淚碧，傷心飄泊看燈青。

綠鬢二首

綠鬢依稀未零落，青春漫付只荒唐。羅浮夢斷沉沉月，苦海身猶淺淺香。久矣丘園不長佇，偶然市肆一凝望。關心休說詩還酒，慰眼曾看滄與桑。

其二

照眼風華三尺玉，依人小巧一枝春。銷香猶是憑虛語，對影幸能窺遠塵。空憶雲衣嗟往事，遙看花靨想天真。湘腰楚鬢唯餘夢，地北天南各自身。

海幣

深沉海蝕青銅綠，淺淡波搖明月寒。時歲從知多少事，滄桑曾歷往還瀾。借窺人世初窮變，似有天機一試看。剝去復來未可曉，晚潮歸客不須嘆。暮訪北海岸，潮汐間得銅幣一。